



*Senin, 23 Agustus 2021*  
**Ogen: Masmur 119:105**



**Nerangi Dalam**



**J**esus rusur kal nikapken waktuNa ercakup-cakap ras Bapa, lawes IA ku ingan si melungun gelah i je banci ia konsentrasi megiken sora Bapa. Nikapken paksa ras ingan si khusus e perlu kal lako megiken sora Dibata. I tengah-tengah kesibuken si teptep wari buat waktu khusus ras Tuhan. Ndarat i bas rutinitas nari, kundul si sada bas ingan si melungun, kai pe labo ilakoken seakatan megiken kata Tuhan. Sora Tuhan e teneng, lembut. Gelah banci sibegi kataNa e kita pe arus teneng, sinik, perukurenta tertuju man Tuhan saja, ras kita kundul alu teneng i lebe-lebeNa.

Pengalamenta banci saja seri, eme mesera kal megiken kata Tuhan. Adi ertoto, buen kita nuri-nuri kerna kecibalta, ras pemindon si enggo erderan, sitik pe la lit kesempatan Tuhan ngerana banta. Uga nge akapndu si begi soraNa, adi labo si bere kesempatan man baNa lako erbelas?

Perlu kal lit perencanaan jumpa ras Tuhan, banci kenca kerina anak-anak tunduh entah ope lenga ia medak. Kita perlu waktu dua-dua saja ras Tuhan. Si pesikap pusuh ras ukurta lako megiken IA ngerana, kerna sura-suraNa nandangi kita. Arah pusuh si mbages nari, ngerana IA man banta, isuratkenNa kataNa i bas Pustaka Si Badia. Tupung kita ngoge kataNa e, Kesah Si Badia si erkusik man banta erti kata e. Dungna si dat me sura-sura Dibata si man dalanken bas kegeluhen. Kata Tuhan e ngasup mbersihkan pusuhna arah perukuren doni si melket. Kata Dibata e nerangi perukuren si gelap, seh maka la papak nahe erdalan. Mata Tuhan natap kempak kalak si nikapken pusuhna guna kata Dibata.

Nai orang tua kontak mata ras anakna, iangka anak e kai sura-sura nandena. Genduari adi kontak mata kita ras Tuhan, me siangka dengalah sura-sura Tuan e man banta?